

# 抄明李英征曲先(今庫車)故事並略釋

岑仲勉

余爲明初四衛考，太息於藍玉、李英征西諸役，無紀行以貽後，遂令偉績豐功，湮沒不著。（金陵學報六卷二期二二頁）旣來本所，見明實錄，意或可得較多之史料，然試檢之，則藍玉一行，仍乏細敍，惟涉李英者視明史較詳。宣宗實錄卷七洪熙元年下云：

（八月戊辰）陝西行都司土官都指揮李英討安定、曲先寇，敗之，以捷報聞。永樂末，朝廷遣中官喬來喜、鄧成等使西域，道經安定、曲先之地，番寇五千（或作十）餘人邀劫之，掠所齎賜幣，來喜、成皆被害。仁宗皇帝臨御，命英與必里衛土官指揮康壽等討之。英等率西寧諸衛及隆奔國師賈失兒、監藏、散丹星吉等十二番簇之兵，至罕東問故，罕東衛指揮綽里加言實安定衛指揮哈三孫、散哥及曲先衛指揮散卽思、卜答（一作哈）忽等所爲。英等遂進兵討賊，賊驚走，英追擊，踰崑崙山西行數百里，至雅令闕之地，與安定寇黨鎖南等戰，敗之，斬首四百八十（或無八十字）餘級，生擒七百餘人，獲駝馬牛羊十四萬有奇。曲先之賊，聞風遠遁，英欲窮追，以道險遠，遂還，至是以聞，且俟後命。安定王桑兒加失夾等躬詣闕請罪，上謂侍臣曰，安定本畏兀兒之地，我朝置衛設官以安集其人，待之素厚，夷狄見利忘義，今之敗實其自取。然朝廷馭夷，叛則討，順則撫，彼能悔過歸誠，朕何吝寬貸。○己巳，勅諭都指揮李英、指揮康壽、魯失加曰，爾等祇事我皇祖太宗文皇帝，據忠竭誠，奮志效力，屢著勳勞，淳加爵秩。我皇考仁宗昭皇帝嗣承天位，以安定等處番官殺害朝使，劫奪財物，勅爾等勦戮，除害安民。爾等能敬恭朝命，率衆深入，多所俘獲，使兇憝滅跡，良善安居，道路往來，永無患害，眷爾忠勤，深用嘉悅。朕嗣位之初，方任將帥以清邊境，

使皆如爾等盡心盡力，何寇不滅，何功不成，雖臘將，又何過也。今特遣禮部主事楊鏞宴勞爾等，所獲人口馬駝，悉送京師，牛羊以賞隨征將士，爾等馳驛來朝。

此段前半，明史略同，惟永樂末作二十二年，鄧成作鄧誠，使西域作使烏斯藏，然使藏似不必取道天山南路，則實錄較明史可信。道經安定、曲先，史作次畢力求江黃羊川；斬級亦作四百八十，惟生擒作七十餘小異，下文進番童固祇十五人也。魯失加是莊浪衛土官，實錄卷十同年有云：

(十月甲申)行在右軍左都督李英言、莊浪衛土官指揮同知魯失加所部土軍土民二百六十人，舊隸隨駕三千之數，今從征安定還，請仍令魯失加管領訓練，遇有邊警，易於調用，從之。

李英本作李洪，觀下賞功條知洪字誤。實錄卷七又云：

(八月壬申)鎮守西寧都督史昭奏、昨陝西土官都指揮李英征西番還，安定王桑兒加失夾來朝，爲臣言刦殺使臣首惡，乃曲先衛指揮散卽思、安定衛指揮哈答土滅禿等，皆未就擒；又奏罕東衛土官指揮卻里加諸簇從英征討還者，今皆移近西寧以居，臣意其畏散卽思等攻剽，故遠徙以避，宜令復居罕東。上曰，居近西寧則易於制馭，遠人當因其所欲而懷之，遂勅昭聽居西寧，但加意撫綏未禽餘寇，待英至問故而後處置。及英至，言餘寇畏威遠遁矣，上曰，既遁則不必窮追。

此言安定指揮哈答土滅禿，與前文哈三孫散哥異。卻里加卽前綽里加之異譯。抑明人往往誤明初四衛爲地近青海者，實因各衛人民逐漸有若干東徙，其先威力西及，猶得知原衛所在，迨邊勢日蹙，則祇能就其移居內地者綏撫之，無怪乎四衛之移來西寧矣。史昭所奏，卽四衛人民漸有內移之實證，曰「遠徙以避」，更見罕東原部相去之遠。涉內徙事，更有實錄卷十一同年一條可相佐證，茲並引如下：

(十一月己未)罕東衛土官指揮那那奏、所屬番民桑思塔兒等一千五百人例納差發馬二百五十疋，數年多逃居赤斤，近都督李英等率兵捕寇，逃者驚愕，欲聚衆還歸，(本作攻)乞爲招撫復業。上謂行在兵部尙書張本曰，此初失於撫綏，致其逃竄，彼雖彊悍，我能安之，則彼亦安矣，其令費瓈等差

人同那往招撫令歸，無責其過，舊所負差發馬悉免之。

由罕東逃赴赤斤，是東移之一證。若李英輩賞功，則實錄卷十同年云：

(十月己巳)陝西行都司土官都指揮同知李英至京，進所獲安定番童一十五人及馬駝。上謂兵部臣曰，番人作過，不得已征之，得其首惡足矣，童子何罪，卽遣還本土，無父母可依者付各衛令善養之，馬駝付御馬監。

辛未，以征安定、曲先功，陞陝西行都司都指揮同知士官李英爲右軍都督府左都督，食祿不視事，給世襲誥命，並賜織金綺絲襲衣鈔銀綵幣表裏。其從征有功將士在陝西者，遣官以鈔銀幣等物往賜之。陞罕東衛土官指揮使卻里加、必里衛土官指揮同知康壽、莊浪衛土官指揮同知魯失加、俱爲陝西行都司都指揮僉事，不理司事，給世襲誥命。其餘有功官軍，悉次第陞秩。

明史謂「英以此封會昌伯」，實錄未見。

以上所抄各節，雖無如何特殊消息，然（1）出使西域——非烏斯藏——則安定、曲先不當在西寧、青海。（2）宣宗謂「安定本畏兀兒之地」，回紇勢力從東南及青海。余前謂四衛本不在青海，可於明人著述字裏行間得之，（同前引文二一頁）今得此，則其說益確定，無煩乎旁徵博引矣，故亟存之。三十一年八月下旬順德岑仲勉識。

頃得讀新西北月刊第二期（三十一年十二月二十日）陳秉淵青海李土司世系考，言英爲李南哥之子，宣德二年封會寧伯，並敍其後事頗詳，可以參觀，卅二年一月中旬仲勉附識。